


醫

會

編



醫說續編卷第九

頭面門

三陽頭痛

丹霞僧病頭痛常居暗室不敢見明其頭熱痛以布圍其巔上置冰於中日易數次熱不能已諸醫莫識其證求見戴人戴人曰此三陽畜熱故也乃置炭火於暖室中出汗涌利三法併行七日方愈僧顧從者曰此神仙手也

熱厥頭痛

彭吳張叟年六十餘歲因病熱厥頭痛以其用湯藥時已一月間矣加之以灸其人先利藏府年高身困



出門見日而仆不知人家人驚惶欲揉撲之戴人立止曰大不可擾續與西瓜凉水蜜雪少頃而蘇蓋病人年老涌泄血脉易亂身體內有炎火外有六陽是以跌仆若又擾之便不救矣惟安定神思以凉水救之待之以靜靜便屬水自然無事若他醫必惑足以知戴人之諳練

並儒門事親

又

昔有人年少時氣弱常於氣海三里灸之節次約五七十壯至年老添熱厥頭痛雖冬天大寒猶喜寒風其頭痛則愈微來暖處或見煙火其痛復作五七年不愈皆灸之過也與清上瀉火湯而愈

按明堂云人年三十已上若不灸三里令氣上衝目所以灸三里下氣也苟使下氣何患之有又曰若要安三里莫要乾而此云灸之以成熱厥頭痛何歟羅謙甫以周卿少年之子患虛中有熱灸此諸穴而愈以是觀之安可舍而不用乎恐少年不必多灸俟氣平復而止可也三十以上亦必觀人形何似而灸之恐失於少年多灸之過臨病處治不必泥焉

### 風痰頭痛

東垣嘗病頭痛發時兩頰青黃暈眩目不欲開懶言身體沉重兀兀欲吐潔古曰此厥陰太陰合病名曰風痰以局方玉壺丸治之灸俠谿即愈是知方者體也法者用也徒執體而不知用者弊體用不失可謂



上工矣

並秘藏

### 氣虛頭痛

栢叅謀名德字仲實年六十一歲壬子年二月間患頭痛不可忍晝夜不得眠邀羅謙甫視之其人云近在燕京初患頭昏悶微痛醫作傷寒解之汗出後痛轉加復汗解病轉加而頭愈痛遂歸每過郡邑召醫用藥一同到今痛甚不得安臥惡風寒而不喜飲食診其六脉弦細而微氣短而促語出而懶內經云春氣者病在頭年高氣弱清氣不能上升頭面故昏悶此病本無表邪因發汗過多清陽之氣愈虧損不能上榮亦不得外固所以頭苦痛而惡風寒氣短弱而不喜食正宜用順氣和中湯一服減半再服全愈內

經云陽氣者衛外而為固也今年高氣弱又加發汗衛外之氣愈損其方以黃耆甘溫補衛實表為君人參甘溫當歸辛溫補血氣白芍藥酸寒收衛氣為臣白朮陳皮灸甘草苦甘溫養衛氣生發陽氣上實皮毛肥腠理為佐柴胡升麻苦平引少陽陽明之氣上升通百脉灌溉周身者也川芎蔓荊子細辛辛溫體輕浮清利空竅為使也明年春赴召至六盤山曹郎中以古風見贈云東垣李明之蚤以能醫鳴易水得奧訣為竭黃金籬一燈靜室窮內經黃帝拊掌岐伯驚日儲月積不易售半世豈但三折肱所長用藥有活法舊方堆案白魚生君不聞李延同居且同病一下一汗俱得明早平乃知古人一證有一方後世以



方合證此理殊未明公心審是者誰子直以異已喧  
譟聲先生飲恨臥黃壤門生賴汝卓卓醫中英活人  
事業將與相一旦在已權非輕連年應召天策府廉  
臺草木皆欣榮好藏漆葉青粘散莫使樊何獨擅名  
寶鑑

### 勞役頭痛

丹溪曰東陽陳兄筋稍露體稍長本虛而作勞頭痛  
甚至有決別之言予察其脉弦大而數以人參為君  
川芎陳皮為佐與之五六日未減衆皆訝藥之不對  
予曰藥力有次第矣更與兩日當自安忽其季來問  
曰何不少加黃芪予笑不荅又經宿忽自言病頓愈  
予脉之覺指下稍克又半日病者言膈上滿不覺飢

視其腹紋已隱予曰夜來藥中莫加黃芪否曰然止  
與三貼遂速與二陳湯加厚朴枳殼黃連瀉其衛三  
貼而安

論餘

### 常風晞髮患頭疼

樞密董孟起在帥閫時命呂元膺臨診俾審新故病  
元膺切其脉兩手寸口俱浮弦脉法浮為風弦為痛  
兩寸屬上部即告之曰明公他無所苦首風乃故病  
也蓋得之沐而中風當發先一日則劇劇則大吐而  
後已董笑曰然予少時喜沐每迎風以晞髮因致頭  
作痛痛則一如公言公善診幸予療也為製龍腦芎  
犀丸四分二之一遂愈

九靈山房集

### 論偏頭風用藥



諸家止言偏頭風而不知其所屬故多不效左邊屬

風荆芥薄荷屬血虛川芎當歸芍藥右邊屬痰蒼朮半夏屬熱酒黃芩偏

正頭風以瓜蒂末鼻內嚙之

### 偏頭痛

一婦人年四十餘病額角上耳上痛名呼為偏頭痛如此五七年每病大便燥結如彈丸兩目赤連眩暈昏澁不能遠視世之所謂頭風藥餅子風藥白龍丸芎犀丸之類連進數服其痛雖稍愈唯大便稍秘而目轉昏澀其頭上針灸數十百穴連年着灸其兩目且將失明由病而無子一日問戴人戴人診其兩手脉急數而有力風執之甚也余諳此四五十年矣遍察病目者不問男子婦人必偏正頭痛必大便澁滯

結硬此無他頭痛或額角是三焦相火之經及陽明燥金勝也燥金勝乘肝則肝氣鬱肝氣鬱則氣血壅壅則上下不通故燥結于裏尋至失明治以大承氣湯令河水煎二兩加芒硝一兩煎成頓令温合作三五服連服盡蕩滌腸中垢滯結燥積熱下便如湯二十餘行次服七宣丸神功丸以潤之菠菱葵菜猪羊血為羹以滑之後五七日但遇天道晴明以大承氣湯夜進一劑是痛隨利減也三劑之外目豁首輕燥澤結釋得三子而終儒門事親

### 蠟治頭風

湖南押牙顏思退治頭風掣痛用蠟二觔鹽半觔相和於錫鑪中熔令相入捏作一堯鑿勢可合腦量大



小搭頭至額頭痛立止

經驗方

### 腦寒鼻衄宜灸

王叔權云予年踰壯寒夜觀書每覺腦冷飲酒過量腦亦疼甚後因灸顛會穴而愈有兵士患鼻衄不已予教令灸此穴即愈有人久患頭風亦令灸此穴即愈但銅人明堂經只云主鼻塞不聞香臭等疾而已故予書此以補其治療之缺然以腦戶不宜針觀之顛會亦不宜針鍼經止云八鍼已下不宜鍼恐未盡也

### 頭旋

叔權母氏隨叔權赴任為江風所吹身體頭動搖如在舟車上如是半年乃大吐痰徧服痰藥并灸頭風

### 諸穴方愈

### 腦熱疼

有士人患腦熱疼甚則自牀投下以腦拄地或得冷水粗得減而疼終不已服諸藥不效人教灸顛會而愈熱疼且可灸況冷疼乎凡腦痛腦旋腦瀉先宜灸顛會而強間等穴蓋其次也

資生經

### 都梁丸治腦痛頭昏

王定國因被風吹項背拘急頭目昏眩太陽并腦俱痛自山陽拏舟至泗州求醫楊吉老既診脉即與一彈丸便服王因款話經一時再作併進兩丸病若失去王甚喜問為何藥答云公知道得其中一味即傳此方王思索良久自川芎防風之類凡舉數種皆非



但一味白芷耳王益神之此藥初無名王曰是藥傳  
自都梁名人可名都梁丸也大治諸風眩暈婦人產  
前產後乍傷風邪頭目昏重及血風頭痛服之令人  
目明凡沐浴後服一二粒甚佳暴寒乍暖神思不清  
傷寒頭目昏暈最宜服之用香白芷大塊擇白色新  
潔者先以椶刷刷去塵土用沸湯泡洗四五遍右爲  
細末煉蜜和丸如彈子大每服一九用荆芥點臘茶  
細嚼下食後常服諸無所忌只乾嚼咽亦可集

### 大頭天行病

泰和二年東垣以進納監濟源稅時四月民多疫癘  
初覺增寒體重次傳頭面腫盛目不能開上喘咽喉  
不利舌乾口燥俗云大頭天行親戚不相訪問如染

之多致不救張縣丞姪亦得此病至五六日醫以承  
氣加藍根下之稍緩翌日其病如故下之又緩終莫  
能愈漸至危篤或曰李明之存心於醫可請治之遂  
命診視具說其由明之曰夫身半已上天之氣也身  
半已下地之氣也此邪熱客於心肺之間上攻頭目  
而爲腫盛以承氣下之瀉胃中之實熱是誅罰無過  
殊不知適其所至爲故遂處方用黃芩黃連味苦寒  
瀉心肺間熱以爲君橘皮苦平玄參苦寒生甘草甘  
寒瀉火補氣以爲臣連翹鼠粘子薄荷葉苦辛平板  
藍根味苦寒馬勃白殭蚕味苦平散腫消毒定喘以  
爲佐新升麻柴胡苦平行少陽陽明二經不得伸枯  
梗味辛溫爲舟楫不令下行共爲細末半用湯調時



時服之半蜜為丸噙化之服盡良愈因嘆曰往者不可追來者猶可及凡他所有病者皆書方以貼之全活甚衆時人皆曰此方天人所製遂刊於石以傳於永久試效方

頭項偏腫如半壺

南鄉陳君俞將赴秋試頭項偏腫連一目狀如半壺其脉洪大戴人出示內經曰面腫者風此風乘陽明經也陽明氣血俱多風腫宜汗乃與通聖散入生薑葱根豆豉同煎一大盞服之微汗次日以草莖刺鼻中大出血立消儒門事親

頂腫痛

澧陽有士人之子驚風後頂腫醫以半夏南星為細

末新水調傅而愈若灸則宜灸前項等穴云資生經

木瓜煎治項筋強痛

人病項筋強痛自午後發黃昏時定予曰此患必先從足起經言十二經絡各有筋惟足下少陰之筋自足至項大抵筋者肝之合也日中至黃昏天之陽陽中之陰也又曰陽中之陰肺也自離至兌陰旺陽弱之時故靈寶畢法云離至乾腎氣絕而肝氣病肝腎二藏受陰氣故發於是時予授以木瓜煎方三服而

愈良方

面熱治法

楊郎中之內五十一歲身體肥盛巳酉春患頭目昏痛面赤熱多服清上藥不效請予治之診其脉洪大



而有力內經云面熱者手陽明病脉經云陽明經氣盛有餘則身已前皆熱况其人素膏梁積熱於胃陽明多血多氣本實則風熱上行諸陽皆會于頭故面熱之病生矣先以調胃承氣湯七錢黃連二錢犀角一錢疎利三兩行徹其本熱次以升麻加黃連湯去經絡中風熱上行如此則標本之病邪俱退矣

### 面寒治法

真定府維摩院尼長老六十一歲身體瘦弱已酉十月間病頭面不奈寒氣弱而不敢當風行諸治不效請予診其脉弦細而肥且病人年高常食素茶菓而已此陽明之經本虛脉經云氣不足則身已前皆寒慄又加看誦經文損氣由此胃氣虛經絡之氣亦虛

不能上達頭面故大惡風寒先以附子理中丸數服而溫其氣次以升麻加附子湯行其經絡數服良愈  
上熱下寒頭面赤腫

中書右丞姚公茂六旬有七宿有時毒至元戊辰春因酒再發頭面赤腫而痛耳前後腫尤甚曾中煩悶咽嗑不利身半已下皆寒足脛尤甚由是以牀相接作炕身半已上臥於牀身半已下臥於炕飲食減少精神困倦而體弱命予治之診得脉浮數按之弦細上熱下寒明矣內經云熱勝則腫又云春氣者病在頭難經云畜則腫熱砭射之也蓋取其易散故也遂於腫上約五十餘刺其血紫黑如露珠之狀頃時腫痛消散又於氣海中大艾炷灸百壯乃助下焦陽虛



退其陰寒次於三里二穴各灸三七壯治足胛冷亦  
引導熱氣下行也故遂處一方名曰既濟解毒湯以  
熱者寒之然病有高下治有遠近無越其制度以黃  
芩黃連苦寒酒製炒亦為因用以瀉其上熱以為君  
桔梗甘草辛甘溫上升佐諸苦藥以治其熱柴胡升  
麻苦平味之薄者陰中之陽散發上熱以為臣連翹  
苦辛平以散結消腫當歸辛溫和血止痛酒煨大黃  
苦寒引苦性上行至巔驅熱而下以為使投劑之後  
腫消痛減大便利再服減大黃慎言語節飲食不旬  
日愈並寶鑑

小兒面腫

黃氏小兒面赤腫兩目不開戴人以銚鍼刺輕砭之

除兩目尖外亂刺數十針出血三次乃愈此法人多  
不肯從必欲治病不可忌護儒門事親

面上酒齧病即酒齧鼻

或問酒齧病為名必飲熱酒所致乎趙以德曰不然  
非飲酒者亦病之蓋鼻者肺之竅而足陽明挾鼻上  
至目內眥其位居面之中中又屬土為呼吸氣息出  
入之門戶然氣血之精明皆上注于面入于其竅是  
故胃中濕熱與中焦所化之血上輸於肺隨呼吸之  
息薰蒸鼻端凝結皮膚遂成紅赤甚則盈面不獨在  
鼻也予嘗用凌霄花為末和蜜陀僧用唾調敷甚驗

藥要或問

痰壅面脹



一婦人五十餘歲素多怒因食燒猪肉次早面脹絕不思食身倦怠六脉沉瀯而兼豁大丹溪作體虛有痰所隔不得降當以補虛利痰藥為主每日早以二陳湯加人參白朮大劑與一貼服後探吐令吐出藥辰時已後與三和湯三倍加白朮二貼至睡後以神祐丸七丸以撓其痰去牽牛服至一月而安

醫案

### 面部赤風粉刺

治面部生瘡或鼻臉赤風粉刺用盡藥不效者惟有此藥可治神妙不可言每以少許臨臥時洗面令淨如面油用之近眼處勿塗數日間瘡腫處自平赤亦消如風刺粉刺一夕見效閱提點方用生硫黃半錢香白芷半錢芫青七箇去全蝎一箇洗炒瓜萋半錢膩粉半錢蟬

殼五箇洗去泥右為細末麻油黃蠟約度如合面油多少熬溶取下離火入諸藥在內每用少許塗面上

### 治酒齧并鼻贅肉雀子斑

趙君猷撫幹所傳云有貳卿趙再可知湖州時與一詩僧相厚而僧患酒瘡鼻端生赤贅數枚大者如橘小者如梅李下垂過口飲食言語皆所妨廢良自厭惡之郡有一小兵事刀鐮人但聞其善取靨痣不知其能治酒瘡也一旦自言於僧請醫此疾即以藥傳之凡半月餘每日取惡物如膿血自皮膚出者甚多其贅後悉成痂落去鼻面瑩然遂以十千為謝且語貳卿俾直齋閣而求得其方以傳秀邳治人良驗用黃丹五文餅藥五十文著礪砂三十文研巴豆十箇去



裏壓去 右件同入餅藥罐子中慢火熬三兩沸取下  
其油 續入研細生礦灰三錢酒渣鼻用鵝毛掃在紅處一  
日一次上藥以追出毒物病退即止雀子斑用小竹  
棒兒挑藥點患處纔覺微腫即便洗去恐力太猛並集  
成

### 眉心眉梁骨痛

眉心并眉梁骨疼者痰飲也宜用二陳湯煎飲吞下  
青州白丸子最驗得效方

### 喘急門

#### 論喘證不同

戴原理云有痰喘有氣急喘有胃虛喘有火炎上喘  
痰喘者凡喘便有痰聲氣急喘者呼吸急促而無痰

聲有胃虛喘者擡肩擷肚喘不休火炎上喘者乍進  
乍退得食則減食已則喘大槩胃中有實火膈上有  
稠痰得食入咽墜下稠痰喘即止稍久食已入胃反  
助其火痰再升上喘反大作俗不知此作胃虛治以  
燥熱之藥以火濟火昔葉都督患此諸醫作胃虛治  
之不愈後以導水丸利五七次而安金匱  
鈞玄

### 灸喘

一貴人久患喘夜臥不得而起行夏月亦衣夾背心  
予知是膏肓病也令灸膏肓而愈亦有暴喘者予知  
是痰爲梗令細剉厚朴七八錢重以姜七片水小椀  
煎七分服滓再煎服不過數服愈若不因痰而喘者  
當灸肺俞凡有喘與哮者爲按肺俞無不痰疼皆爲



繆刺肺俞又令灸而愈亦有只繆刺不灸而愈者此病有淺深也

### 繆刺氣悶

舍弟登山爲雨所搏一夕氣悶幾不救見昆季必泣有欲別之意予疑其心悲爲刺百會不效按其肺俞云其疼如錐刺以火鍼微刺之即愈因此與人治哮喘只繆刺肺俞不刺他穴惟按肺俞疼痠者然後點其他穴非是

並資生經

### 盛則爲喘治驗

己未歲初秋越三日羅謙甫奉召至六盤山時至八月中霖雨不止時承上命治不瀕吉及元帥夫人年踰五旬身體肥盛因飲酒喫潼乳過度遂病腹脹喘

滿聲聞于外不得安臥大小便澁滯氣口脉大兩倍於人迎關脉沉緩而有力因思霖雨之濕飲食之熱濕熱大盛上攻於肺神氣躁亂故爲喘滿邪氣盛則實實者宜下之故制平氣散以下之一服減半再服喘愈止有胸膈不利煩熱口乾時時咳嗽以加減瀉白散治之內經曰肺苦氣上逆急食苦以瀉之故曰牽牛苦寒瀉氣分濕熱上攻喘滿故以爲君陳皮苦溫體輕浮理肺氣青皮苦辛平散肺中滯氣故以爲臣檳榔辛溫性沉重下痰降氣大黃苦寒蕩滌滿實故以爲使也

實鑑

### 胎毒爲喘

張進士子二歲患痰喘見其精神昏倦病氣深決非



外感此胎毒也蓋其母孕時喜食辛辣熱物所致勿與解利藥因處一方以人參連翹川芎黃連生甘草陳皮芍藥木通煎入竹瀝服之數日而安治法

### 寒喘方

滁陽高司法名申之每苦寒喘疾發甚時非此藥不能治方名五味子湯用橘皮三兩甘草一兩麻黃四兩去根二兩杏仁二兩麩炒右為粗末水一盞半藥末二大錢煎至七分去粗通口服不拘時候如喘甚加藥末入馬兜鈴桑白皮同煎夏月減麻黃一兩

醫方集成

### 氣喘吐逆

忽然氣上喘不能語言口中汁流吐逆齒皆搖動氣

出轉大則悶絕復蘇如是名曰傷寒併執霍亂用大黃人參末各半兩水三盞煎至一盞去粗熱服得効

夢遺門附便濁

### 灸夢遺

有士人年少覓灸夢遺為點腎俞痠疼令其灸而愈不拘老少皆腎虛也古人云百病皆生於心又曰百病皆生於腎心勞生百病人皆知之腎虛亦生百病人未知也蓋天一生水地二生火腎水不上升則心火不下降茲病所由生也人不可不養心不愛護腎也

資生經

### 陽盛拒陰精滑不固

中書粘合公年三十二歲病脚膝痿弱臍下尻臀皆



冷陰汗臊臭精滑不固省醫黃道寧主以鹿茸九十  
旬不減至戊申春具錄前證始求治於東垣東垣遂  
診其脉沉數而有力乃曰公飲醇酒以膏粱滋火于  
內逼陰于外醫見其證蓋不知陽強陰不能密以致  
膚革冷而溢泄以為內實有寒投以熱劑欲瀉其陰  
而補其陽真所謂實實虛虛也其不增劇者為幸矣  
復何獲效即處以滋腎丸大苦寒之劑製之以急寒  
因熱用引入下焦適其病所瀉命門相火之勝再服  
而愈公以厚禮更求前藥東垣固辭竟亦不受或問  
曰物不受義也藥既大驗不復與何也曰夫大寒大  
熱之藥非久服者惟從權也今公之疾相火熾盛以  
乘陰位故用此大寒之劑以瀉相火而助真陰陰既

復其位則皮表之寒自消矣內經云陰平陽秘精神  
乃治如過用之則故病未已新病復起矣此予之意  
也試效方

### 治遺泄方

平江譚醫云夫遺泄尋常只治心腎未有別治以素  
問仲景考之當治脾服此藥屢效用厚朴二兩姜汁製  
羊脛一兩炭火煨過通紅取出右二味白水麵糊為  
丸如梧桐子大每服百丸至三百丸米湯下集

### 夢交遺精

鄭叔魯年二十餘攻舉業夜讀書每至四鼓猶未已  
忽發病臥間但陰著物便夢交接脫精懸空則無夢  
飲食日減倦怠少氣蓋以用心太過二火俱起夜不



得眠血不歸經腎水不足火乘陰虛入客下焦鼓其精房則精不得聚藏而欲走因陰著物由厥氣客之故作接內之夢於是上補心安神中調脾胃升舉其陽下用益精生陰固陽之劑不三月而病安矣

### 白濁治法

嘗聞先生論白濁多因濕熱下流膀胱而成赤白濁即靈樞經所謂中氣不足溲便爲之變是也先瀉補中氣使升舉之而後分其藏府氣血赤白虛實以治與夫其他邪熱所傷者固在瀉熱補虛設腎氣虛甚或火熱亢極者則不宜峻用寒涼之劑必以反佐治之要在權衡輕重而已並藥要或問

### 便濁痛風

張子原氣血虛有痰痛風時作陰火間起小便白濁或兼下赤用白朮熟地黃黃柏炒各二兩人參山藥蛤粉南星各一兩龜板酒炙二錢瑣陽乾姜燒灰半兩取其不走右末之糊丸服

### 夢遺便濁

一人便濁常有半年或時夢遺形瘦作心虛主治用珍珠粉丸和定志丸服之並治法

### 倒倉治白濁遺精

鎮海萬戶蕭伯善以便濁而精不禁丹溪以倒倉法試之甚效格致餘論

### 婦人白濁

一婦人年近六十形肥奉養膏粱飲食肥美中焦不



清濁氣流入膀胱作下注白濁濁氣即是濕痰用二陳湯去痰升麻柴胡升胃中之清氣加蒼朮去濕白朮補胃全在活法服四貼後便濁減大半覺胸滿因升麻柴胡升動胃氣痰阻滿悶用二陳湯加炒麴白朮香附子素無痰者升動胃氣亦不滿也

金匱鈞玄

### 心腹門

#### 心痛分久新治

凡心痛之疾須分久新若明知身受寒氣口得寒物而痛於初得之時當與溫散或溫利之藥若病得之稍久則成鬱矣鬱則蒸熱熱久則生火原病式中僅言之矣若欲行溫散溫利能無助火添病邪由是古方多以山梔為熱藥之引導則邪易伏病易退正氣

復而病安矣雖然病安之後若縱慾口味不改前非致病復作必咎醫之不才矣

治法

### 心腹脹痛

已朱在金陵有家提幹內人病心腹脹痛眾醫投木香檳榔大腹芍藥姜桂之類病益甚召僕診之六脉弦緊而和不似病脉但診之時兩手如火以此知其熱痛也眾問如何治療僕曰大凡心腹刺痛不可便作虛冷治之有二醫荅曰非冷而何熱即生風冷生氣是也僕曰不然難經云虛則痺實則痛又仲景云腹痛者桂枝加芍藥湯痛甚者桂枝加大黃湯家提幹云荆布素來質弱僕曰有可辯處遇痛時使一婢按之若痛止是虛寒證也若按之轉甚手不可近此



實痛也即令一婢按之手不可近叫喚異常僕曰此實熱無可疑者當用大柴胡湯治之衆皆不許僕與責狀而投之八服愈

良方

### 心脾疼痛宜針灸

荆婦舊侍親疾累日不食因得心脾疼發則攻心腹後心痛亦應之至不可忍則與兒女別以藥飲之疼反甚若灸則遍身不勝灸矣不免令兒女各以火針微刺之不拘心腹須臾痛定即欲起矣神哉

又

叔權舊患心脾發則疼不可忍急用瓦片寘炭火中燒令通紅取出投米醋中漉出以紙三二重裹之置疼處稍止冷即再易者舊所傳也後閱千金方有云

凡心腹冷痛熬鹽一半熨或熬蚕沙燒磚石蒸熨取其裏溫暖止或蒸土亦大佳始知予家所用蓋出千金方也他日心疼甚急灸中脘數壯覺小腹兩邊有冷氣自下而上至灸處即散此灸之功也本事方載王思和論心忪非心忪也胃之大絡名曰建里絡胸膈及兩乳間虛而有痰則動更須臾發一陣是其證也審若是又當灸建里矣但不若中脘爲要穴云

### 用心致心疾

左傳巫臣以夏姬之故怨子反曰余必使汝疲於奔命以死子反於是一歲七奔命遂遇心疾而卒則又因用心而成疾矣然則如之何平居當養其心使之和平疾自不作其次則當服鎮心丹之類以補養之



可也若疾將作而針灸抑亦可以為次矣

並資生經

### 胃脘痛

一將軍病心痛不可忍戴人曰此非心痛也乃胃脘當心痛也內經曰歲木太過風氣流行民病胃脘當心而痛乃與神祐丸一百餘粒病不減或問曰此胃脘有寒宜溫補將軍素知戴人明了復求藥于戴人戴人復與神祐丸二百餘粒作一服大下六七行愈

### 酒蟲心痛

酒官楊仲臣病心氣痛此人常好飲酒初飲三二杯必奔走頓懶兩足三五十次其酒稍散方能復席至前量一醉必五七次至明嘔青黃水數日後變魚腥臭六七日始安戴人曰宜涌乃吐蟲一條赤黃色長

六七寸口目鼻皆全兩目膜瞞狀如蛇類以鹽淹乾

示人

並儒門事親

### 胃脘當心而痛

兩浙江淮都漕運使崔君長男雲卿年二十有五體本豐肥奉養膏粱時有熱證友人勸食寒涼物及服寒涼藥於至元庚辰秋病瘧久不除醫以砒霜等藥治之新汲水送下禁食熱物瘧病不除反添吐利脾胃復傷中氣愈虛腹痛腸鳴時復胃脘當心而痛不任其苦屢易醫藥未效至冬還家百般治療不差延至四月間因勞役煩惱過度前證大作請予治之具說其由診得脉弦細而微手足稍冷面色青黃而不澤情思不樂惡人煩冗飲食減少微飽則心下痞悶



嘔吐酸水發作疼痛冷汗時出氣促悶亂不安瀕人  
額相抵而坐少時易之予因思內經云中氣不足洩  
便為之變腸胃為之苦鳴下氣不足則為痿厥心惋  
又曰寒氣客於腸胃之間則卒然而痛得炆則已炆  
者熱也非甘辛大熱之劑則不能愈遂製一方名之  
曰扶陽助胃湯三服大勢皆去痛減半至秋先灸中  
脘三七壯以助胃氣次灸氣海百餘壯生發元氣滋  
榮百脉以還少丹服之則喜飲食添肌肉潤皮膚明  
年春灸三里二七壯乃胃之合也亦助胃氣又引氣  
下行春以芳香助脾復以育氣湯加白檀香平治之  
戒以懲忿窒慾慎言語節飲食一年而平復內經曰  
寒淫于內治以辛熱佐以苦溫附子乾薑大辛熱溫

中散寒故以為君草豆蔻仁益智仁辛甘大熱治客  
寒犯胃為佐脾不足者以甘補之炙甘草甘溫白朮  
橘皮苦溫補脾養氣水挾木勢亦來侮土故作急痛  
桂辛熱以退寒水芍藥味酸以瀉木來尅土吳茱萸  
苦熱泄厥氣上逆於胃中以為使也

寶鑑

### 胸痛為熱酒所傷

一人飲熱酒食物梗塞胸痛蓋有死血而然白朮貝  
母麥芽香附一兩瓜蒌仁桃仁杏仁牡丹皮生甘草  
乾葛山梔黃芩紅花萆澄茄右或丸或散任意服之

### 心疼昏厥

有老人心腹大痛而脉洪大而虛痛昏厥不欲食不  
勝一味攻擊之藥宜四君子湯加當歸麻黃沉香服



之

又

凡心膈大痛腰背攻走發厥諸藥不納大吐者就吐  
中以鵝翎探吐之出痰積一大椀而痛自止

小腹唧唧如蟹聲

一人小腹下常唧唧如蟹聲作陰火處治用敗龜板

酥炙鹽酒

側栢

用酒九蒸九焙

黃栢

酒炒

知母

酒炒

川芎

酒製

當歸酒製右各等分酒糊丸每服八十九丸淡鹽湯送下並治法

心痛宜倒倉

丹溪云吾師許文懿公益之病心痛用藥燥熱香辛如

丁附桂姜輩治數十年而足攣痛甚且惡寒而多嘔

甚而至於靈砂黑錫黃芽歲丹繼之以艾火萬餘壯

又雜治數年而痛甚自分為廢人衆工亦技窮矣如  
此者又數年因其煩渴惡食者一月以通聖散與半  
月餘而大腑逼迫後重肛門熱氣如燒始下積滯如  
五色爛錦者如柏燭油凝者近半月而病似退又半  
月而畧思穀而兩足難移計無所出至次年三月遂  
作倒倉法節節如應因得為全人次年再得一男又  
十四年以壽終餘論

心脾脹痛

監縣一閤年五十餘春末心脾疼自言腹脹滿手足  
冷過膝肘湏綿裹火烘胸襟畏熱却喜掀露得風涼  
則快脉皆沉細瀦稍重則絕輕則似弦而短口乾渴  
而喜熱飲穀肉全不食遂以草豈菴丸加黃連滑石



炒麩爲丸白朮爲君茯苓爲臣陳皮爲使作湯送下一百丸服至二觔諸證悉愈

### 心疼頭痛互作無時

一婦人四十餘歲因二十年憂患後心痛或可按或不可按食甚減口渴而不思飲形瘦骨立心痛止則頭痛其痛無常處頭痛止則心痛作夜間全不寐大便七八日一行堅小而黑而出亦難累與四物湯加陳皮生甘草前後約百餘貼病雖不增亦無退減此病久爲火抑鬱氣不得行由是血亦畜塞遂成汗濁氣壅則頭痛作血濁不行則心痛作通一病也治肺當自愈遂效東垣清空膏例以黃芩細切酒浸透炒令赤色爲細末以白朮湯調下頭上稍汗如此十餘

貼漸漸汗出周身及膝而止諸痛皆愈因其膝上無汗形瘦病久小水數大便澀左右皆見澀脉當議補血以防後患問其由思水而不飲遂以四物湯加陳皮生甘草桃仁酒黃芩以補之遂安

### 心脾大痛爲宿食所致

蔣氏子年十六歲久瘧方愈十日而心脾大痛兩手脉皆伏痛稍殺時氣口緊盛餘脉皆弦實而細余曰此宿食病也詢之因食冷油煎餛飩子遂以小胃丹津液嚥十餘粒仍斷飲食經三日凡與小胃丹十二次痛不作至晚下忽大痛連及兩脇余曰此必與穀太早問之果然遂斷其餘食亦不與藥蓋宿積因小胃丹而消解其痛因新穀與餘積相併而痛若又攻擊



必大傷胃氣所以不與藥又斷食三日其家大恐以爲不救時有怨言予曰六日不能食因強禁不與方成惡候待其索食然後與之又須較量方可至夜更餘心嘈索食予先用白朮黃連陳皮作丸遂以熱湯下七八十九以止其嘈其家欲與粥余曉之曰適間非饑也乃餘飲未了因氣而動遂成嘈雜若以爲饑而與食其痛又如前矣其家苦欲與予詢病者膈間莫尚悶否答曰我方饑作必繼之滿悶今雖亦未甚快然亦未思食過兩時許又索食又以前丸子與之如是者又盡夜饑不作亦昏困思睡予教以稀粥減平日之半兩日禁其雜食調理半月而安

並醫案

### 腹臍疝痛因寒所感

王宗祥之父年老病臍腹疝痛其里醫爲溫中散寒卒無驗宗祥邀滑伯仁往視脉兩尺搏堅而沉曰此大寒由外入也寒喜中下因爲疝治宜在下加沉降之劑引入下焦數服尋愈

白雲集

### 論腹痛所因

寒痛者綿綿痛而無增減者是也時痛時止者熱也死血痛者每痛有處不行走也遷移痛者是食積也痛甚欲大便利後痛減者是濕也痰痛者凡痛必小便不利也食能作痛宜溫散之不可用利藥大下之蓋食得寒則凝得溫則化更兼行氣快氣之藥助之無不可者

治法

### 眩暈門



論眩暈所因治法

痰在上火在下因炎上而動其痰故眩暈非皆因於風也如原病式諸風掉眩皆屬肝木此一端耳蓋痰證多眩無痰不能作眩然風眩暈亦必有痰矣火動其痰用二陳湯加黃芩蒼朮羌活防風等散風行濕之劑如眩暈不可當者以大黃三錢三次酒炒為末茶調服之壯實人氣實有痰或頭重或暈皆治之

眩暈舌麻

一婦人體肥因氣鬱舌麻眩暈手足亦麻氣塞有痰便結用涼膈散加南星香附台芎開之見上

腰脇門

論腰痛分治脉法

經云轉搖不能腎將憊矣治宜補腎有瘀血者宜行滯血順氣有濕宜燥濕行氣有痰宜快其氣使痰隨氣運佐以痰藥大抵必弦而沉弦者為虛沉者為滯右澁者是瘀血緩者是濕滑者是痰或伏火者是腎虛

腰膝痛

王紹顏續撰傳信方著其法云頃年在姑熟之日得腰膝痛不可忍醫以腎藏風毒攻刺諸藥莫療因覽傳信方備有此驗立脩製一劑便減五分步履便輕故錄之耳用海桐皮一兩牛膝一兩羌活一兩地骨皮五兩加皮各一兩甘草半兩薏苡仁二兩生地黃十兩八物淨洗焙乾細剉用綿一兩都包裹入無灰酒二斗浸冬二七



日夏一七日候熟空心食後日午晚臥時時一盃長  
今醺醺藥不用添減禁毒食本草

### 灸腰痛

張仲文傳神仙灸法療腰重痛不可轉側起坐難及  
冷痺脚筋攣急不可轉側屈伸灸曲蹠兩文頭左右  
脚四處各三壯每灸一脚二火齊下艾炷到肉初覺  
疼痛用二人兩邊齊吹火至滅午時著灸人定以來  
藏府自動一兩行或轉動如雷聲其疾立愈此法神  
效卒不可量也

### 感水腰疼

許知可因淮南大水忽腹中如水吼調治得愈自此  
腰痛不可屈伸思之此必感水氣而得乃灸腎俞三

七壯服麋茸丸愈予謂腰痛不可屈伸灸腎俞自效  
不服麋茸丸亦可

### 火鍼刺腰痛

舍弟腰疼出入甚艱余用火鍼微微頻刺腎俞則行  
履如故初不灸也屢有人腰背偃僕來覓點灸予意  
其是筋病使然為點陽陵泉今歸灸即愈筋會陽陵  
泉也然則腰疼又不可專泥腎俞不灸其他穴也上巳

並資  
生經

### 腰脚痛為腎經積熱

安國軍節度使開國侯程道濟云天德四年予在中  
都監脩大內正患腰脚疼痛之疾殆將二年服食湯  
藥皆附姜硫黃種種燥熱之藥中脘臍下艾炷十數



終無一效愈覺膝寒胃冷少力多睡飲食日少精神日衰詢諸名醫衆口一辭僉曰腎部虛寒非熱藥不能療及自體究亦覺惡寒喜暖但知此議爲是因諮後醫董系者彼云腎經積熱氣血不通故也洎與談論惟舉五行旨畧鈐斷用藥治病止五七方而已其餘醫書脉訣一無所有僕意寡學不通之人捨而不問後見治諸人其應如神貧者酬勞辭而不受反有周急之者以故日加敬重再論脚疾復陳五行造化勝負伏逆真理始似喚醒洒然不疑方肯聽信再用辛甘寒藥瀉十二經之積熱日三四服通利十餘行數十日後覺痛減飲食有味精力爽健非舊日之比自後飲食服餌皆用寒涼數年之間疾去熱除神清

體健以此知平昔將攝失宜醫藥差錯之過也

原病式序

### 腰脚不伸

棠谿李十八郎病腰脚大不伸偃僂蹙蹙而行已數年矣服藥無功止藥却愈因秋暮涉水病復作醫氏使服四斤丸其父李仲安乃乞藥于戴人戴人曰近日服何藥仲安曰四斤丸曰目昏赤未其父驚曰目正暴發戴人曰宜速來不來則喪明矣既來則策杖而行目腫無所見戴人先令涌之藥忽下走去二十日兩目頓明策已棄矣比再涌泄能讀官曆日調至一月令服當歸丸健步而歸

### 腰尻脊膂痛

一男子六十餘病腰尻脊膂皆痛數載不愈晝靜夜



躁時大痛徃來屢來自盡天且夕則痛作必令人以  
手槌擊至五更雞鳴則漸減向曙則痛止左右主病  
者皆作鬼神陰譴白虎嚙朝禱暮祝覲巫僧道禁師  
至則其痛似減又夢鬼神戰鬪相擊山川神廟無不  
祭禱淹延歲月肉瘦皮枯飲食減少暴怒日增惟候  
一死有書生曰旣云鬼神虎嚙陰譴之禍如此禱祈  
何無一應聞陳郡有張戴人精於醫可以問其鬼神  
白虎與病乎彼若術窮可以委命其家從之戴人診  
其兩手脉皆沉滯堅勁力如張組謂之曰病雖瘦難  
於食然腰尻脊膂皆痛必大便堅燥其左右曰有五  
七日或八九日見燥糞一兩塊如彈丸結硬不可言  
曾令人剗取之僵下一兩塊渾身燥痒皮膚皴揭枯

澁如麩皮戴人旣得病之虛實陰用大承氣湯以薑  
棗煎之加牽牛頭末二錢不敢言是瀉劑蓋病者聞  
暖則悅聞寒則懼說補則從說瀉則逆此弊非一日  
也而况一齊衆楚乎及煎成使稍熱咽之從少至多  
累至三日天且晚藏府下泄四五行約半盆以燈視  
之皆燥糞硬塊及瘀血雜藏穢不可近頃臆痛減九  
分昏睡鼻息調如常人睡至明日將夕始覺饑而索  
粥溫涼與之又因睡一二日其痛盡去次令飲食調  
養日服導飲丸甘露散滑利便溺之藥四十餘日乃  
復嗚呼世傳三十六虎書三十六黃經及小兒三十  
六疳誰爲之耶始作偏者其無後乎古人以醫爲師  
故醫之道行今之人以醫譬奴故醫之道廢有志之



士耻而不學病者亦不擇精粗一槩待之嘗見官醫  
迎送長吏馬前唱喏真可羞也由是通今博古者少  
而師傳遂絕靈樞經謂刺與汚雖久猶可拔而雪結  
與閉雖久猶可解而決夫腰脊胯痛者足太陽膀胱  
經也胯痛足少陽膽經之所過也難經曰諸痛爲實  
內經曰諸痛痒瘡瘍皆屬心火註曰心寂則痛微心  
躁則痛甚人見巫覡僧道禁師至則病稍去者心寂  
也然去後又來者終不去其本也古稱痛隨利減不  
利則痛何由去病者既痊乃壽八十歲故凡燥證皆  
三陽病也

### 因寒腰強

北人衛德新因之析津冬月飲寒則冷病腰常直不

能屈伸兩足沉重難於行步途中以牀昇迤程程問  
醫皆云腎虛以菴蓉巴戟附子鹿茸皆用之大便反  
秘潮熱上周將經歲矣乃乞拯於戴人戴人曰此疾  
十日之效耳衛曰一月亦非遲戴人曰足太陽經血  
多病則腰似折脰如結膈如裂太陽所至爲屈伸不  
利况腰者腎之府也身中之大關節今既強直而不  
利宜鹹以熨之頓服則和柔矣難經曰強力入房則  
腎傷而髓枯枯則槁骨乃壞而不用與此意同今君  
之證太陽爲寒所遏血隧下滯腰間也必有積血非  
腎也節次以藥可下數百行約去血一二斗次以九  
曲玲瓏竈蒸之汗出三五次而愈初蒸時至五日問  
曰腹中鳴不口德新曰未也至六日覺鳴七日而起已



能揖人戴人曰病有熱者勿蒸蒸則損人目也

懷恐脇痛

洛陽孫伯英因誣獄妻子被繫逃于故人是夜覺胃  
脇痛托故人求藥故人曰有名醫張戴人適在焉當  
與公閑往時戴人宿酒未醒強呼之故人曰吾有一  
親人病欲求診戴人隔窓望見伯英曰此公伏大驚  
恐故人曰何以知之戴人曰面青脫色膽受怖也後  
會赦乃出方告戴人並儒門  
事親

感寒濕為腰脇痛

東垣曰丁未冬曹通甫自河南來有役人小翟露宿  
寒濕之地腰痛不能轉側兩脇搐急作痛已經月餘  
不愈矣腰痛論中說皆為足太陽足少陰血絡中有

凝血作痛間有一二證屬少陽膽經外絡脉病皆去  
血絡之凝乃愈其內經有云冬三月禁不得用針只  
宜服藥通其經絡破其血絡中敗血以川芎肉桂湯  
治之而愈秘藏

痰氣攻脇

一人脇下痰氣攻痛以控涎丹下如麵之狀後用白  
芥子行痰辛以散痛

胸右刺痛

一人胸右一點刺痛虛腫自覺內熱攻外口角流涎  
不止恐成附癰貝母瓜蒌南星去涎紫蘇梗瀉肺氣  
黃芩黃連姜炒陳皮茯苓導而下行香附枳殼寬膈  
痛皂角刺解結痛桔梗浮上不食加白朮凡吐水飲



不用瓜萋恐泥用蒼朮之類並治法

腎邪病為脇痛

里鍾姓者一男子病脇痛衆醫以為癰也投諸香姜桂之屬益甚項彥章診其脉告曰此腎邪病法當先溫利而後竭之投神保丸下黑洩痛止即令更服神芩丸或疑其太過彥章曰向用神保丸以腎邪透膜非全竭不能引導然巴豆性熱非得芒硝大黃蕩滌之後遇熱必再作乃大泄數出病已彥章所以知男子之病者以陽脉弦陰脉微澀弦者痛也澀者腎邪有餘也腎邪上薄於脇不能下且腎方惡燥今以燥熱發之非得利不愈經曰痛隨利減殆謂此也九靈集

服水銀病腰痛

劉立之治一婦人患腰痛已歷年諸藥不效劉診之云病雖危殆然一夕可安主人訝焉乃請其藥答曰不須藥但用鉛粉二三十兩壯士五人大鈴五七枚足矣於是主家悉備劉命撤去牀帳幔移置屋中以米飲和粉置病婦腰周迴令其舒臥壯士一人負鈴遠牀急走使其聲不絕人倦即易之至夜半後其婦稍能自起立既而腰痛頓釋舉家拜云師神醫也願聞其意劉云此病因服水銀所致然水銀客腰窞間不能出故疼不已今用鉛粉粉乃水銀所化為金之毋取金音以毋呼子毋子合德出投粉中則病愈矣

史醫



醫說續編卷第九

醫說續編卷第十

腳氣門

腳氣宜砭刺

崑山周恭輯

楊太受云腳氣是為壅疾治當以宣通之劑使氣不能成壅也壅既成而盛者宜砭惡血而去其重勢經曰畜則腫熱砭射之也後以藥治之

王機微義

南方腳氣病禁

外臺秘要云第一忌嗔嗔則心煩煩則腳氣發又禁大語語則傷肺傷肺亦發動又不得露足當風入水以冷水洗足兩腳脛尤不宜冷雖暑月當須着綿袴至冬寒倍令兩脛溫暖得微汗大佳依此將息氣漸



薄損每至寅丑日割手足甲須少侵肉去氣夏時膝理開不宜當風臥睡睡覺令人按按勿令邪氣稽留數勞動關節當令通暢此並養生之要拒風邪之法也尋常有力每食後行三五百步疲倦便止腳中惡氣隨即下散雖浮腫氣不能上也本方

按發明云第一忌酒及醢酪勿使過度過則損傷脾胃下症於足脛附腫遂成腳氣第二慾不可縱嗜慾則腳氣發凡飲食之後宜緩行如上法經云逸者行之又云病在脾禁飽食濕地濡衣

### 繆刺腳氣

予舊有腳氣疾遇春則足稍腫夏中尤甚至冬腫漸消偶夏間依素問註所說三里穴之所在以溫鍼微刺之翌日腫消其神效有如此者繆刺且爾況於灸乎有此疾者不可不知

### 治腳氣有三

一金云腳氣一病最宜鍼灸若鍼而不灸灸而不鍼非良醫也鍼灸而藥藥而不鍼灸亦非良醫也此論甚當

### 治腳氣說

有同舍爲予言史載之謂腳氣有風濕二種宜瀉不宜補只宜以沉香湯瀉見既效方而不許其灸千金方乃載灸法如此其詳豈虛人患腳氣方可灸耶故指迷方云若覺悶熱不得灸蓋有所見也凡灸腳氣三里絕骨爲要而以愛護爲第一予舊有此疾不履濕則



數歲不作若履濕則頻作自後常忌履濕凡有水濕不敢着鞋踐之或立潤地亦不敢久須頻移足而後無患此亦愛護之第二義也有達官久患腳氣多服八味丸愈亦以腳氣衝心惟此藥能治之

### 腳瘦弱

有人舊患腳弱且瘦削後灸三里絕骨而腳如故益知黃君鍼灸圖所謂絕骨治腳疾神效信然也同官以腳腫灸承山一穴瘡卽乾一穴數月不愈不曉所謂豈亦將攝之失宜耶是未可知也

### 刺腳腫

執中母氏常久病夏中腳忽腫舊傳夏不理足不敢着艾謾以鍼置火中令熱於三里穴刺之微見血凡數次其腫如失去執中素患腳腫見此奇效亦以火鍼刺之翌日腫亦消何其速也後常灸之凡治腳腫當先三里而後陽躄等穴可也

### 腳腫爛

予患腳氣指縫爛每以茶末摻之愈他日便腫而爛用茶末不效漸腫至腳背上予以爲腳氣使然竊憂之策杖而後敢行偶賣藥僧者見之云可取芥薦下塵摻之如其言摻之而愈此物不值一錢而能愈可憂之疾其可忽哉

並資生經

### 腳氣發熱自汗

乙巳年羅安人病發熱自汗心煩身體骨立足痛拘攣不能屈伸飲食不進雖老醫亦不能療召僕治之



六脈弦弱僕曰雖脈似勞實非勞也似腳氣而非正  
腳氣但當調脾生血其熱必退然後攻足則可望安  
通尋諸方皆無對證之藥遂處四白散子與服不半  
劑熱退能食又處蒼朮丸繼之筋脈伸足能行而愈  
方長

### 北方腳氣

乙巳春平章廉公希憲年三十八身體中肥腳氣始  
發頭面渾身肢節微痛皆赤色足脛赤腫痛不可忍  
不敢扶策手近皮膚其痛轉甚起而復臥臥而復起  
晝夜苦楚難以名狀命省掾曹德裕求予治之平章  
以北土高寒故多飲酒積久傷脾不能運化飲食下  
溜之所致投以當歸拈痛湯一兩二錢痛減半再服

痛悉除止有右手指末微赤腫以三稜鍼刺其爪甲  
端出黑血赤腫全去數日因食濕麵肢體覺痛再以  
枳實大黃湯治之發明

又

中書粘合公年四旬有一軀幹魁梧丙辰春從征至  
揚州北之東武隅腳氣忽作遍身肢體微腫其痛手  
不能近足脛尤甚履不任穿跣以騎馬控兩鐙而以  
竹器盛之以困急來告予思內經有云飲發于中跣  
腫于上又云諸痛爲實血實者宜決之以三稜鍼數  
刺其腫上血突出高二尺餘漸漸如線流於地約半  
升許其色紫黑頃時腫消痛減以當歸拈痛湯重一  
兩半服之是在得睡明日再服而愈本草十劑云宜



可去壅通可去滯內經云濕淫于內治以苦溫羌活  
苦辛透關節而勝濕防風甘辛溫散經絡中流濕故  
以爲主水性潤下升麻乾葛苦辛平味之薄者陰中  
之陽引而上行以苦發之也白朮苦甘溫和中勝濕  
蒼朮體輕浮氣力雄壯能去皮膚腠理間濕故以爲  
臣夫血壅而不流則痛當歸身辛溫以散之使血氣  
各有所歸人參甘草甘溫補脾胃養正氣使苦劑不  
能傷胃仲景云濕熱相合肢節煩疼苦參黃芩知母  
茵陳苦寒乃苦以泄之者也凡酒製炒以爲因用治  
濕不利小便非其治也猪苓甘溫平澤瀉鹹平淡以  
滲之又能導其流飲故以爲佐氣味相合上下分消  
其濕使壅滯之氣得宣通也

實鑑

### 腳氣轉筋由乎血熱

一人筋動於足大指漸漸上來至大腿近腰結了奉  
養且厚因酒食作此是熱傷血四物湯加酒黃芩紅  
花蒼朮南星愈

### 氣自腳起入腹如火

氣從腳上起入腹如火者乃虛極也至於火起於九  
泉之下此病十不救一一法以附子末塞其湧泉穴  
內以四物湯加降火之藥服妙

並治法

### 膝胛腫痛

一男子年近三十滋味素厚性多焦怒秋間於髀樞  
左右發痛一點延及膝胛晝靜夜劇痛處惡寒口或  
渴或不渴膈或痞醫用風藥兼補血藥至次春膝漸



腫痛甚食漸減形羸瘦至春末膝漸腫如枕不可屈  
伸診其脈弦大頗實寸濇甚大率皆數短其小便必  
數而短遂作飲食痰積在大陰陽明治之黃栢酒炒一兩  
生甘草稍錢三生犀角屑錢三蒼木鹽炒三錢川芎三錢陳皮兩半  
牛膝兩半木通芍藥各半兩遇暄熱加條芩二錢為末秤三  
錢重與薑汁同研細適中以水盪起令沸帶熱食前  
服之一日夜四次與之半月後數脈漸減痛漸輕去  
角屑加牛膝敗龜板兩半當歸身尾兩半如前服之又與  
半月多腫漸減食漸進不惡寒惟腳膝痿軟未能久  
立久行去蒼木黃芩時夏月加炒栢至半兩餘依本  
方內加牛膝春夏用莖秋冬用根惟葉汁用之效尤  
速須絕酒肉濕麵胡椒年紀中年加生地黃兩半冬月

加桂枝茱萸醫案

腳氣潰黃水

澗東僉憲史君素苦足病發則兩足如柱潰黃水踰  
月乃已已輒復發項彥章診脈告曰六脈皆沉緩沉  
為裏有濕緩為厥為風此病風濕毒俗名濕腳氣是  
也乃以神芎丸竭之繼進舟車神祐九下濁水數升  
遂不發動九靈山房集

養腎散治腳氣

忠州太守陳逢原傳云渠前知坊州因暑中取涼食  
瓜至秋忽然右腰腿間疼痛連及膝脛曲折不能經  
月右腳艱於舉動凡治腰腳藥服之無效兒子雲安  
刑曹偶在商熙助教處得養腎散方服之纔一服移



刻舉身麻痺不數刻間腳遂屈伸再一服即康寧又坊州監酒某年幾四十虛損兩腳不能行步試與此藥初進二錢大腿麻未遂能起立再服二錢大小指搦皆麻迤邐可行三服馳走如舊太室居士得此方乾道己丑歲在鄂州都幕府日宋判院審言久病腳膝緩弱不能行傳之數日來謝此疾經年無藥不服得方次日即合二服見效五服良愈今有力能拜起矣後數日又云因浴遍身去薄皮如糊肌骨遂瑩其效如神其方用全蝎兩半天麻三錢蒼朮一兩去黑皮二錢去皮二錢黑附子二錢去皮二錢黑皮一兩去草烏頭二錢去皮二錢黑皮一兩去

如是骨髓中痛用胡桃酒下此藥傷寒中風皆治  
木瓜蒸艾法

金山長老於張顯學甘露寺齋會上說此方云渠舊患腳氣曾於天台一僧處傳方用木瓜蒸艾服之漸安後來住金山日日登陟腳復酸重又一堂衆處得此方合服頗覺輕健勝前日方云破故紙炒舶上茴香酒浸一宿炒葫蘆芭炒牛膝酒浸一宿肉荬蓉酒浸一宿川續斷揀淨杜仲去粗皮姜汁製一晝夜炒令絲斷黃色用各四兩同爲細末右用艾四兩去枝梗秤以大木瓜四箇切作合子去盡穰以艾實之用麻線扎定蒸三次爛研和藥爲丸如梧桐子大每服五七十九温酒鹽湯食後服

脚氣流注四肢



申屠府判傳腳氣流注四肢手指腫痛不可屈伸四物湯去地黃加附子入薑煎服如常法遇疾作時服之必愈 是齋云治腳氣上攻流注四肢結成腫核不散赤熱焮痛及治一切腫毒用甘遂爲細末以水調傳腫處又濃煎甘草一味服之其腫卽散二物本相反須兩人買各處安頓切不可相和清流廳子韓詠苦此一服病去七八再服而愈云得之牛馬牙人醫者之意正取其相反故以甘遂傳其外而以甘草引於內所以作效如磁石引鍼之義也

並集成

### 誤治腳氣

趙良仁云予至吳中有徐孟達患兩足痠重不任行動發則疼痛一日在不發之時求診於予三部脈皆

大而搏手如葱葉無力身半以上則肥盛予以其膏梁美飲食御衆妾嗜慾無窮精血皆不足濕熱又太盛因處以益精血於其下清濕熱於其上二方與之或人言腳氣無補法因聽之不服比三月後其病作一醫用南方法治不效一醫用北方法瀉之卽死于溺器上吁治證不識其虛執方施治若此之誤人者多矣

藥要或問

### 秘結門

#### 蜜兌治便秘

文潞公在北門日盛夏間苦大腑不調公隨行醫官李琬本衢州市戶公不獨終始涵容之又教以醫事公病泄利琬以言動搖之又求速效卽以赤石脂龍



骨乾薑等藥饋公公服之累日不大便其勢甚苦初虞世共城來見公未坐定語及此事公又不喜服大黃藥虞世告曰此燥糞在直腸藥所不及請以蜜笕導之公以爲然時七月中苦熱虞世冒汗爲公作蜜笕先是夕三用藥下結糞四五十枚大如胡桃色黑如橡栗公二三日間飲食已如故

良方

### 偶瀉愈便秘

子和曰頃有老人年八十歲臟腑澁滯數日不便每臨後時目前星飛頭目昏眩鼻塞腰痛積漸日減縱得少便秘結燥如彈一日友人命食血藏葵羹波菱菜遂頓食之日日不乏前後皆利食進神清年九十歲無疾而終圖經云波菱寒利腸胃芝麻油炒而食之利大便寬腸利小便年老之人大小便不利最爲急切此蓋偶得瀉法耳

### 大便少而頻

太康劉倉使病大便少而頻日七八十次常於兩股間懸半枚瓠蘆如此十餘年戴人見之而笑曰病旣頻而少欲通而不得通也何不大下之此通因通用也此一服藥之力乃與藥大下二十餘行頓止

### 臂麻不便

鄆城梁賈人年六十餘忽曉起梳髮覺左手指麻斯須半臂麻又一臂麻斯須頭一半麻比及梳畢從脇至足皆麻大便二三日不通往問他醫皆云風也或藥或鍼皆不解求治于戴人戴人曰左手三部脈皆



伏比右手小三倍此枯澁痺也不可純歸之風亦有  
火燥相兼乃命一涌一泄一汗其麻立已後以辛涼  
之劑調之潤燥之劑濡之惟小指次指尚麻戴人曰  
病根已去此餘烈也方可鍼谿谷谿谷者骨空也一  
日晴和往鍼之用靈樞雞足法向上臥鍼三進三引  
訖復卓鍼起向下臥鍼送入指間皆然手熱如火其  
麻全去昔劉河間作原病式常以麻與澁同歸燥門  
中真知病機者也

### 大便燥結

戴人過曹南省親有姨表兄病大便燥澁無他證常  
不敢飽食飽則大便極難結實如鐵石或三五日一  
如圍目前星飛鼻中血出肛門連廣腸痛痛極則發

昏服藥則病轉劇凡巴荳芫花甘遂之類皆用之過  
多則困瀉止則復燥如此數年遂畏藥性暴急不服  
但病臥待盡戴人過診其兩手脈息俱滑實有力以  
大承氣湯下之繼服神芎丸麻仁丸等藥使食菠菱  
葵菜及猪羊血作羹百餘日充肥親知見駭之嗚呼  
粗工不知燥分四種燥於外則皮膚皴揭燥於中則  
精血枯涸燥於上則咽鼻焦乾燥於下則便溺結秘  
夫燥之爲病陽明化也水液衰少故如此然可下之  
法當擇藥而巴荳可以下寒甘遂芫花可以下濕大  
黃朴硝可以下燥各有宜用故內經曰辛以潤之醎  
以奠之周禮亦曰以滑養竅

並儒門  
事親

### 風秘



攢宮有一老人患風祕八九日不通有木匠授以此方只一服見效用不甞皂角當中取一寸許去黑皮以沸湯半盞泡上用盞蓋定候通口服之先辦少粥通後卽食是齊方

○淋祕門

小便不利治法

治小便有隔二隔三之治如因肺燥不能生水則清肺金此隔二如不因肺燥但膀胱有熱則直瀉膀胱火此正治如因脾濕不運精氣不升故肺不能生水則當燥脾健脾此隔三清肺用車前子茯苓之類瀉膀胱用黃柏知母之類健脾燥脾用蒼朮白朮之類有氣結於下宜升又諸治法不通則用吐法蓋氣承

載其水耳吐之則氣升氣升則水降矣

淋澄治法

淋澄有五皆屬于熱解熱利小便爲最用山梔子之類同虎杖甘草煎湯服下焦熱結血淋用小蘗腎虛極而淋者當補腎精及利小便不可獨瀉老人氣虛者人參白朮帶木通山梔亦有死血作淋者牛膝膏亦能損胃不食痰熱隔滯中焦淋澀不通用玄明粉大抵淋證不可發汗汗之必便血

苦杖治沙石淋

鄞縣武尉耿夢得其內人患沙石淋者十三年每漩痛楚不可忍溺器中小便下沙石碌碌有聲百方不效偶得一方用苦杖根俗呼杜牛膝者多取淨洗碎



之一合以水五盞煎至一盞去滓用麝香乳香少許調服一夕而愈目所見也

良方

### 五倍子治遺瀝

予壯年寓學忽有遺瀝之患因閱方書見有用五倍子末酒調服者服之而愈藥若相投豈在多品而亦無事於灸也故附著于此

### 淋疾服王不留行

若欲治淋疾則有王不留行子神效彭侍郎以治張道士服三粒愈

見既效方

有婦人患淋臥病久之服諸藥愈甚其夫入夜來告急予令取此花葉十餘葉令研細煎服翌朝再來云病已減八分再與數葉煎服即愈

愈

一名剪金花一名金盞銀臺並資生經

### 沙石淋

酒監房善長之子年十三病沙石淋已九年矣初因瘡疹餘毒不出作便血或告之令服太白散稍止後又因積熱未退變成淋祕每發則見鬼神號叫驚鄰里適戴人客鄧墻寺以此病請戴人曰諸醫作腎與小腸病者非也靈樞言足厥陰肝之經病遺溺祕瘕秘謂小溲不行瘕謂淋瀝也此乙木之病非小腸與腎也木爲所抑火來乘之故熱在脬中下焦爲之約結成沙石如湯瓶煎煉日久熬成湯鹵今夫羊豕之脬吹氣令滿常不能透豈真有沙石而能漏者耶以此知前人所說服五石丸散而致者恐未盡然內經曰木鬱則達之先以瓜蒂散越之次以八正散加湯



齟等分頓啜之其沙石自化而下

### 二便秘

屈村張氏小兒年十四歲病約一年半矣得之夏秋發則小腸大痛至握其峻跳躍旋轉號呼不已小溲數日不能下下則成砂石大便秘澀肛門脫出一二寸諸醫莫能治聞戴人在朱葛寺避暑乃負其子而哀請戴人戴人曰今日治今日效時日在辰巳間矣以調胃承氣僅一兩加牽牛頭末三錢汲河水煎之令作三五度嚥之又服苦末丸如芥子許六十粒日加脯上涌下泄一時齊出有膿有血涌泄既覺定令飲新汲水一大盞小溲已利一二次矣是夜飲新水凡二三十遍病去九分止哭一次明日困臥如醉自

晨至暮猛然起走索食於母歌笑自得頓釋所苦繼與太白散八正散等調一日大差恐暑天失所養留五日而歸戴人曰此下焦約也不吐不下則下焦何以開不令飲水則小溲何以利大抵源潔則流清也

### 膏淋

鹿邑一閥閱家有子二十三歲病膏淋三年矣鄉中醫不能治往京師遍訪多作虛損補以溫燥灼以鍼艾無少減聞戴人僑居灑東見戴人曰惑蠱之疾也亦曰白淫實由少腹冤熱非虛也可以涌泄其人以時暑憚其法峻不決者三日浮屠一僧曰予以有暑疾近覺頭痛戴人曰亦可涌願與君同之母畏也於是涌痰三升色如黑礬汁內有死血并黃綠水又瀉



積穢數行尋覺病去方其來時面無人色及治畢次日面如醉戴人慮其暑月路遠又處數方使歸以自備云

### 淋

戴人過息城一男子病淋戴人令頓食鹽魚少頃大渴戴人令恣意飲水然後以藥治之淋立通淋者無水故澀也

並儒門事親

### 小便不利

北京人王善甫為京兆酒官病小便不通漸目睛凸出腹脹如鼓膝以上堅硬皮膚欲裂飲食不下甘淡滲泄之藥皆不效東垣曰疾急矣而非精思不能處治容歸而思之夜參半忽攬衣而起曰吾得之矣內

經有云膀胱者津液之府必氣化而能出焉渠輩已用滲泄之藥而病益甚是氣不化也啓玄子云無陽則陰無以生無陰則陽無以化甘淡氣薄皆陽獨陽無陰欲化得乎明日以羣陰之劑投之不再服而愈方名滋腎丸

試效方

### 酸多食之令人癢

至元己巳上都住夏月太保劉仲晦使引進史柔明來曰近一兩月作伴數人皆有淋疾是氣運使然是水土耶予思之此間別無所患此疾獨公所有之殆非運氣水土使然繼問柔明近來公多食甚物曰宣使賜木瓜百餘對遂多蜜煎之每客至以此待食日三五次予曰淋由此也內經曰酸多食之令人癢可



與太保言之奪飲則已一日太保見予問曰酸味致淋其理安在予曰小便主氣鍼經云酸入於胃其氣潛以收上之兩焦弗能出入也不出則留胃中胃中溫和則下注膀胱之胞胞薄以懦得酸則縮繆約而不通水道不行故癰而澀乃作淋也又曰陰之所生本在五味陰之五宮傷在五味口嗜而欲食之必自裁制勿使過焉五味過則皆能傷其正豈止酸味耶太保嘆曰凡爲人子不可不知醫信哉

### 小便數而欠

中書右丞哈刺哈孫病小便數而欠日夜約去二十餘行臍腹脹滿腰脚沉重不得安臥至元癸未季春下旬奉旨治之遂往診視脈得沉緩時時帶數嘗記

小便不利者有三不可一槩而論若津液偏滲於腸胃大便泄瀉而小便澁少一也宜分利而已若熱搏下焦津液因熱濕而不行二也必滲泄則愈若脾胃氣澀不能通利水道下輸膀胱而化者三也可順氣令施化而出也今右丞平素膏粱濕熱內蓄不得施化膀胱竅澀是以起數而見少也非滲泄利分則不能快利遂處一方名曰茯苓琥珀湯內經曰甘緩而淡滲熱搏津液內蓄臍脹腹滿當須緩之泄之必以甘平爲主是用茯苓爲君滑石甘寒滑以利竅猪苓琥珀之淡以滲泄而利水道故用三味爲臣脾惡濕濕氣內蓄則脾氣不治益脾勝濕必用甘爲助故以甘草白朮爲佐鹹入腎鹹味下泄爲陰澤瀉之鹹以



瀉伏水腎惡燥急食辛以潤之津液不行以辛散之  
桂枝味辛散濕潤燥此為因用故以二物為使煎用  
長流甘爛水使不助其腎氣大作湯劑令直達於下  
而急速也兩服減半旬日良愈並寶鑑

### 猪尿胞治洩閉

治小便不通諸藥無效或轉胞至死此法用之便自  
出用猪尿胞一箇底頭出箇小竅兒著翎筒通過放  
在竅內根底細線繫定翎筒口子細杖子堵定上用  
黃蠟封尿胞口頭吹滿氣十分繫定了再用手捻定  
翎筒根頭放了黃蠟堵塞其翎筒放在小便頭放開  
翎筒根頭手其氣透裏自然小便即出大有神效  
脾疼後大小便不通

一婦人脾疼後患大小便不通此是痰隔中焦氣聚  
下焦用二陳湯加木通初服後查再煎探吐之愈

### 燥熱傷下焦致洩澀

一人燥熱傷下焦致小便不利當養陰當歸地黃知  
母黃栢牛膝茯苓生甘草白朮陳皮之類並治法

### 濕邪在表小便不利

甲午秋一婦人年五十初患小便澀醫與八正散等  
劑小腹轉急脹不通身如芒刺予以為所感淋淫雨  
濕邪上居表因用蒼朮為君附子佐之發其表一服  
即汗小便即時便通

### 老人便秘

馬參政父年八旬初患小便短澀因服分理藥太過



遂致閉塞涓滴不出趙良仁以爲飲食太過傷其胃  
陷於下焦用補中益氣湯一服小便通因先多服分  
利藥損其腎氣遂致通後遺尿一夜不止急補其腎  
然後已凡醫之治是證未有不用泄利之劑者安能  
顧其腎氣之虛者哉特表而出之以爲世人之戒並  
要或  
問

### 小便淋痛爲服熱劑所致

金華申叔明年七十因壯年踏冷患疝氣常服蒼朮  
烏附等二十餘年疝氣少止卻患小便淋痛十有三  
年又服朴硝大黃諸治淋之藥百方俱試並無一效  
至是春項頸帶左邊發一疽連及缺盆可尺許不能  
食淋痛愈加必須叫號其瘡淫潰膿血淋漓精神困

憊時正六月診其脈兩手澀短左微似弦狀輕重皆  
近五至丹溪謂此瘡皆前烏附積毒所致此淋亦因  
前燥烈之藥凝積滯血蓄膀胱况澀脉爲敗血短脉  
爲血少耗遂令溺後視之有物出如敗膿者否視之  
果然思之痛甚則傷血叫號亦傷血遂先治淋令取  
牛膝根并莖葉煎取濃汁卻煎四物湯作大料與服  
三日後痛漸減前所謂敗膿者至是漸少五七日後  
淋病痊安比時瘡勢亦定蓋四物能生血也但飲食  
減少瘡未斂耳遂用當歸白朮黃芪大劑於瓦器熬  
成膏以陳皮甘草半夏縮砂木香煎取清汁調藥膏  
飲之遂漸能食及一月而瘡安

### 淋下如漆粟

醫案



丹溪云鄭廉使之子年十六求醫曰我生七箇月患淋病五日七日必一發其發也大痛捫地叫天水道方行狀如漆如粟者約一盞許然後定診其脉輕則澀重則弦視其形瘦而稍長其色青而蒼意其父必因多服下部藥遺熱在胎留於子之命門而然遂以紫雪和黃栢末如梧桐子大曬十分乾而與二百丸作一服經二時又與三百丸作一服率以熱湯下以食物壓之又經半日痛大作連腰腹水道乃行下如漆粟者一大椀許其病減十分之八後張子中以陳皮兩一枯梗木通各半兩作一貼與之又下漆粟者一合許遂安父得燥熱且能病子况母得之者乎予書此以證東垣紅絲瘤之事揮發

洩祕為積痰在肺

一男子病小便不通他醫治以利藥益甚丹溪診之右寸頗弦滑曰此積痰病也積痰在肺肺為上焦而膀胱為下焦上焦閉則下焦塞譬如滴水之器必上竅通而後下竅之水出焉乃以法大吐之吐已病如失

膏淋為三陽病

郡史虞東村內子王年盛嗜酒且善食忽疾作肌肉頓消骨立呂元膺診其脉則兩手三部皆數而左口尤躁疾遂語虞曰此三陽病一水不能勝五火乃移熱於小腸不癢則淋王曰前洩如脂者已數日語未竟趨入臥內旋及需其溺器以視則如飪釜置烈火



湧沸不少休元膺以虎杖滑石石膏黃栢之劑清之  
痛稍却而湧沸猶爾也繼以龍腦辰砂末之蘸以裨  
柿食方寸匕沸輒止

並九靈山房集

### 中滿洩祕為氣化失常

滑伯仁在儀真時御史中丞八臣亦家焉其內人病  
艱於小洩中滿喘渴門僧寶頗知醫投以渠麥梔芩  
諸滑利藥而閉益甚召伯仁候其脉三部皆弦而澀  
伯仁曰經云膀胱者州都之官津液藏焉氣化則能  
出矣所謂水出高源者也臆中之氣不化則水液不  
行病因於氣徒行水無益也法當治上焦乃製朱雀  
湯倍以枳桔煎用長流水一飲而洩再飲氣平數服  
病已

### 洩閉為火盛水衰

端君寶母六十餘病小洩閉若淋狀小腹脹口吻渴  
邀滑伯仁診其脉沉且澀曰此病在下焦血分陰火  
盛而水不足法當治血與水同血有形而氣無形有  
形之疾當以有形治之即以東垣方滋腎丸治之而

愈

並白雲集

### 腹脹小便不通

紹興劉駐泊汝翼云魏邈知明州時宅庫之妻患腹  
脹小便不通垂殆隨行御醫某人治此藥令服遂愈  
瓜萋不拘多少焙乾碾為細末每服三錢重熱酒調  
下不能飲者米飲調下頻進數服以通為度

是齋方

### ○黃疸門



黃疸善食

一男子作贅偶病疸善食而瘦四肢不舉面黃無力其婦翁欲棄之其女子不肯曰我已生二子矣更適他乎婦翁本農者召婚欲作勞見其病甚每日辱詬人教之餌膽礬丸三稜丸了不關涉鍼灸所釀百無一濟戴人見之不診而療使服涌劑去積痰宿水一斗又以泄水丸通經散下四五十行不止戴人命以米水一盃飲之立止次服平胃散等間服檳榔丸五七日黃退力生蓋脾疸之證濕熱與宿穀相搏故也俗謂之食勞黃

治疸得失

朱葛周黃劉三家各有僕病黃疸戴人曰僕役之職

飲食寒熱風暑濕寒尋常觸冒恐難調攝虛費治功其二家留僕於戴人所從其飲餌其一僕不離主人執役三人同服苦劑以涌之又服三花神祐丸下之五日之間果二僕愈而一僕不愈竟如其言也

黃疸食灰

蔡寨一女病黃遍身浮腫面如金色困乏無力不思飲餌惟喜食生物灰炭之屬先以苦劑蒸餅爲丸涌痰一椀又以舟車丸通經散下五七行如墨汁更以導飲丸磨食散氣不數日肌肉如初

黃病可下

安喜趙君玉爲省掾日病發遍身黃往問醫者醫云君乃陽明證公等與麻知幾皆受訓於張戴人是商



議喫大黃者難與論病君玉不悅歸自揣無別病乃取三花神祐丸八十粒服之不動君玉乃悟曰予之濕熱盛矣此藥尚不動以舟車丸瀆川散作劑大下一斗糞多結者一夕黃退君玉由此益信戴人之言並儒門事親

### 穀疸治驗

元顏正卿丙寅二月間因官事勞役飲食不節心火乘脾脾氣虛弱又以恚怒氣逆傷肝心下痞滿四肢困倦身體麻木次傳身目俱黃微見青色顏黑心神煩亂怔忡不安兀兀欲吐口生惡味飲食遲化特下完穀小便癃閉而赤黑辰巳間發熱日暮則止四月尤甚其子以危急求請治之具說其事診其脈浮而

緩金匱要畧云寸口脈浮爲風緩爲痺痺非中風四肢苦煩皮色必黃癆熱以行跌陽脈緊爲傷脾風寒相搏食穀則眩穀氣不消胃中苦濁濁氣下流小便不通陰被其寒熱流膀胱身體盡黃名曰穀疸宜以茯苓梔子茵陳湯主之一服減半二服良愈

### 身熱痿黃

一小兒身體蒸熱胃隔煩滿皮膚如潰橘之黃眼中白睛亦黃筋骨痿弱不能行立此由季夏之熱加以濕令而蒸熱薄於經絡入於骨髓使藏氣不平故脾逆乘心濕熱相合而成此疾也蓋心火實則身體蒸熱胸膈煩滿脾濕勝則皮膚如潰橘之黃有餘之氣必乘已所勝而侮不勝是腎肝受邪而筋骨痿弱不



能行立內經言脾熱者色黃而肉蠕動又言濕熱成痿信哉斯言也此所謂子能令母實實則瀉其子也若脾土退其本位腎水得復心火自平矣又內經曰治痿獨取於陽明正謂此也予用加減瀉黃散主之一服減半待五日再服而良愈

### 陰黃

至元丙寅六月時雨霖霪人多病瘟疫真定韓君祥因勞役過度渴飲涼茶及食冷物遂病頭痛肢節亦疼身體沉重胃滿不食自以爲外感傷用通聖散兩服藥後添身體困甚方命醫治之醫以百解散發其汗越四日以小柴胡湯二服後加煩熱躁渴又六日以三乙承氣湯下之躁渴尤甚又投白虎加人參柴

胡飲子之類病愈增又易醫用黃連解毒湯硃砂膏至寶丹之類至十七日後病勢轉增傳遍身目俱黃肢體沉重背惡寒皮膚冷心下痞硬按之而痛眼澀不欲開眼睛不了了懶言語自汗小便利大便秘了而不了命予治之診其脉緊細按之空虛兩寸脉短不及本位此證得之因時熱而多飲冷加以寒涼藥過度助水乘心反來侮土先囚其子後薄其母經云薄所不勝乘所勝也時值霖雨乃寒濕相合此爲陰證發黃明也予以茵陳附子乾薑湯主之內經云寒濕于內治以甘熱佐以苦辛濕淫所勝平以苦熱以淡滲之以苦燥之附子乾薑辛甘大熱散其中寒故以爲主半夏草薢辛熱白朮陳皮苦甘溫健脾燥濕



故以為臣生薑辛溫以散之澤瀉甘平以滲之枳實苦微寒泄其痞滿茵陳苦微寒其氣輕浮佐以薑附能去膚腠間寒濕而退其黃故為佐使也煎服一兩前證減半再服悉去又與理中湯服之數日氣得平復或者難曰發黃皆以為熱今暑隆盛之時又以熱藥治之何也予曰理所當然不得不然成無已云陰證有二一者始因外傷寒邪陰經受之或因食冷物傷太陰經也二者始得陽證以寒治之寒涼過度變陽為陰也今君祥因天令暑熱傷脾過服寒涼陰氣大勝陽氣欲絕加以陰雨寒濕相合發而為黃也仲景所謂當於寒濕中求之李思順云解之而寒涼過劑瀉之而逐寇傷君正謂此也聖賢之制豈敢越哉

或曰潔古之學有自來矣並寶鑑

○消渴門

論消渴為三焦受病

東垣云消渴之疾三焦受病也上消者肺也多飲水而少食大便如常小便清利知其燥在上焦也治宜流濕以潤其燥消中者胃也渴而飲食多小便赤黃熱能消穀知其熱在中焦也宜下之下消者腎也初發為而膏淋謂淋下如膏油之狀至病成面色黧黑形瘦而耳焦小便濁而有脂液治法宜養血以肅清分其清濁而自愈也活法機要

論調理消渴

張子和曰初虞世言凡渴疾未發瘡瘍便用大黃寒



藥利其勢使大困大虛自勝如發瘡瘍膿血流漓而  
殮此真俗言也故巴郡太守奏三黃丸能治消渴余  
嘗以隔數年不愈者減去朴硝加黃連一觔作兩劑  
以長流千里水煎五七沸放冷日呷之數百次以桂  
苓甘露散白虎湯生藕節汁淡竹瀝生地黃汁相間  
服之大作劑料以代飲水不日而痊故消渴一證調  
之而不下則小潤小濡固不能殺炎上之勢下之而  
不調亦旋飲旋消終不能沃鬲膜之乾下之調之而  
不減滋味不戒嗜慾不節喜怒病已而復作能從此  
三者消渴亦不足憂矣

儒門  
事親

### 韭苗治渴

秦運副云有人消渴引飲無度或令食韭苗其渴遂

止法要日喫三五兩或炒或作羹無入鹽極效但喫  
得十觔卽佳過清明勿喫食醬無妨

本草

### 薑汁治渴

昔有消渴者日飲數斗劉完素以生薑自然汁一盆  
置之密室中具罌杓於其間使其人入室從而鑊其  
門病人渴甚不得已而飲減盡渴減得內經辛以潤  
之之旨又內經治渴以蘭除其陳氣亦辛平之劑也  
劉完素之湯劑雖用此一味亦必有傍藥助之也

### 消中爲主勝客逆

古廉韓子玉父年踰六旬有三病消渴至冬添躁熱  
須裸袒以水噴胸腋乃快日食肉麵數四頃時卽  
饑如此月餘命予治療診得脉沉細而疾予以死決



之子玉及弟泣跪予前曰病固危篤君盡心救治則死而無悔予答曰夫消之爲病其名不一曰食休曰消中曰宣疾此膏粱之所致也陽明化燥火津液不能停自汗小便數故飲一溲二胃熱則消穀善饑能食而瘦王叔和云多食亦饑虛是也此病仲景所謂春夏劇秋冬差時制故也令尊今當差之時反劇乃腎水乾涸不能制其心火而獨旺於不勝之時經曰當所勝之時而不能制名曰真強乃孤陽絕陰者也且人之身元氣爲主天令爲客此天令大寒尚不能制其熱何藥能及內經曰主勝逆客勝從正以此也設從君治療徒勞而已固辭而歸遂易醫與灸不數日而卒其後子玉感予之誠相好愈厚

### 消渴治法

順德安撫張耘夫年四十五歲病消渴舌上赤裂飲水無度小便數多先師以生津甘露飲子治之旬日良愈古人云消渴多傳瘡瘍以成不救之疾旣效亦不傳瘡瘍享年七十五歲而終論曰消之爲病燥熱之氣勝也內經曰熱淫所勝佐以甘苦以甘瀉之熱則傷氣氣傷則無潤折熱補氣非甘寒之劑不能故以石膏甘草之甘寒爲君啓玄子云滋水之源以鎮陽光故以黃連黃栢梔子知母之苦寒瀉熱補水爲臣以當歸麥門冬杏仁全蝎連翹白芷白葵蘭香耳辛寒和血潤燥爲佐以升麻柴胡苦平行陽明少陽二經白荳蔻木香藿香葶澄茄反佐以取之因用桔



梗爲舟楫使浮而不下也先師嘗謂予曰潔古老人  
有云能食而渴者白虎倍加人參大作湯劑多服之  
不能食而渴者錢氏白朮散倍加葛根大作湯劑廣  
服之並寶鑑

### 熱齊治渴誤

方惟益患消渴衆醫以爲腎虛水竭津不能上升合  
附子大丸服之既服渴益甚舊有目疾兼作其人素  
豐肥因是頓瘦損倉皇中召滑伯仁往視之伯仁曰  
陰陽之道相爲損益水不足則濟以水火不足則濟  
以火未聞水不足而以火濟之不焦則枯乃令屏去  
前藥以寒劑下之蕩去火毒繼以苦寒清潤之製竟  
月乃平復云白雲集

### 縹絲湯治渴

縹絲湯治口乾消渴者可用此吐之此物屬火有陰  
之用能瀉膀胱水中相火引清氣上朝於口丹溪本草

### 消渴有蟲

苦楝根取新白皮一握切焙入麝少許水二椀煎至  
一椀空心飲之雖困頓不妨自後下蟲三四條狀如  
虺蟲其色真紅而渴頓止乃知消渴一證有蟲耗其  
津液者



醫說續編卷第十





